



IZTUETA NAZABAL familia

URTSU TXIKI Urtsu-Erreka auzoan dago. Ingu-ruko baso eta zelaian artean dauzkagu *Goiko-soloa, Zelaitxo, Mitxela, Etxauko soroa, Beko soroa*.

Auzoko bidea 1940an egin zen eta etxerainokoa 1960an. Eskolara bidea oinez egiten zuten eta ordu erdikoa zen. Umetan Mikela bera goizean *Agarreurretatik*, bere jaiotetxetik, eskolara bedera-tzietarako joaten zen eta eguerdian hamar xenti-moan erosten zuten ogi opila. Ogia jan ahal izateko ingurutik alde egin behar izaten omen zuten, eta *Bertuesaraino* joaten ziren, bestela harrapatu egi-ten baitzieten.

Mikela *Mariaundirekin* ibili zen josten ikasten. Egun batean lan bat eman zion egiteko eta goiz guztia pasatu *Mariaundiri* nola esan pentsatzen. Azke-nean esan dio lan hori egitea ezinezkoa zela, eta hara nola erantzun zion *Mariaundik*, lasai-lasai, ho-rixe entzun zain zegoela.

1945ean ezkondu ziren Tomax Iztueta *Urtsu Txiki*-ko semea eta Mikela Nazabal, Zaldibiko *Agarreu-rreta* baserriko alaba. 1960an erosi zuten baserria, eta 1970ean egin zituzten konponketak, alegia, su-kaldea, ukulua eta gelak.

Baserrian bazituzten hiru behi eta hantxe lan egi-ten zuen Mikelak. Arrautzak, oilaskoak eta kone-juak alde batetik, eta, bestetik, sagarrak eta baba-rrunak saltzen zituzten Ordizian. Senarrak Fabrika Handian egiten zuen lan, ezkon aurretik ere.

Guardia Zibilak behin baino gehiagotan azaldu omen ziren baserrira miaketak egitera. Halakoxea zen garai hartako bizimodua. Ukuiluko lasto far-doak denak lurrera bota ere bai, noiz edo noiz, az-pian tranpatan ganadua aurkituko ote zuten. Ezer aurkitu ez eta "jaso zak gero hura dena..."

Baserriaren arrastoa idatzietan

Urtsu Txiki 1783an agertzen da, Enerio eta Aralarko sailen erabileraz, Francisco Antonio de Echaveren aurrean, bitartekari bati eman-dako botere-emaileen artean.

Auzo horretakoen artean agertzen dira *Urtsu-Handia, Urtsuko Errota, Urtsuegi eta Urtsu Goena* ere. Biler hartara Urtsu Txikiko bi ordezkari joan ziren, bi familia izango ziren eta, beharbada, orduan.

Pasadizoak

Odolkiak poltsikoan

Bolada batean matantza (txerri edo ardiarena) debekatua zegoen. Eta egun batean anaia kalera jaitsi da eta jaso du lagun baten abisua Guardia Zibilak joango zirela baserrira eta hildako txerria ezkutatzeko. Zer egin jakin ez eta pentsatu dute pieza guztiak teilatu gainera ateratzea. Eta Mike-lak sukaldean zeuzkan odolkiak poltsikoan gorde-ta, atenditu omen zituen Guardia Zibil horiek.

Informazio emailea: Mikela Nazabal



Katalina Aramendi eta Mikela Nazabal (erraina).



IZTUETA familia
Xabino, Alberta eta Tomax.



Tomax Iztueta zuhatz ondoan eserita.



Xabino Iztueta (soldadu).